



PRIMEIRU  
MINISTRU

**ALOKUSAUN  
SUA EXELÊNCIA PRIMEIRU-MINISTRU  
KAY RALA XANANA GUSMÃO NIAN  
IHA OKAZIAUN TOMADA POSSE  
MINISTRU DEFEZA NO SEGURANSA  
V GOVERNUN KONSTITUSIONAL**

**22 Outubru 2012  
Palásiu Prezidensial  
Díli**



Palácio do Governo,  
Avenida Presidente Nicolau Lobato,  
Díli, Timor-Leste

Sua Exelênsia, Presidente Repúblika  
Sua Exelênsia, Presidente Parlamentu Nasional  
Sua Exelênsia, Presidente Tribunal Rekursu  
Sua Exelênsia, Dr. José Ramos-Horta, ex-Presidente Repúblika  
Sua Exelênsia Señor Xefe Estadu-Maior Jeneral F-FDTL  
Sua Exelênsia Señor Komandante-Jeral PNTL  
Sua Exelênsia, Komisáriu UNPOL no Enkarregadu UNMIT  
Sua Exelênsia, Komandante ISF  
Exelênsias, Señores Embaixadores  
Membrus Governu

Señoras no señores,

Krize ne'ebé mosu iha Timor-Leste, iha 2006, aleinde provoka divizaun interna boot iha sosiedade timor laran, sai mos hanesan kauzador konfrontasoens, entre PNTL ho F-FDTL, tanba kleur tebes ona mak la fiar-malu, hodi halo sai aat liután instabilidade sosial ne'ebé sobu lares, katak uma-kain barak, iha fatin barabarak iha rai laran liu-liu iha Dili.

Nune'e, iha Agostu 2007, Governu foun estabelese ona mekanizmu di'ak ida ne'ebé permite forsas rua ne'e koordena hamutuk sira-nia atuasoens. Ministériu Defeza no Seguransa koko sai hanesan resposta di'ak ida hasoru sirkunstânsias ne'ebé país ne'e enfrenta.

Entretantu, tanba razoens hanesan sira-nia envolvimentu iha krize laran, mak forsas rua ne'e la bele halo buat ida, hodi fó uluk lai tempu halo korresoens institusionais.

Trájiku akontesimentu iha 11 Feveiriu 2008 kria situasaun ida ke dramátika tebetebes. Husi parte ida, Estadu ameadadu no ho titulares órgauns soberania nian sira sai hanesan alvus atake, no tanba husi parte seluk, la iha rapidez no respostas adequadas, la bele husik tan ona forsas boot Nasaun nian rua ne'e, ne'ebé responsáveis ba defeza no seguransa Estadu, país no povu nian, atu tuur hakmatek no kontinua la halo buat ida, ne'e ita la bele simu. Buat hirak ne'e hotu fanun fali konsiênsia kona-ba dever, hodi sai hanesan oportunidade únika ida lori hakotu, dala ida no para sempre, imaturidade iha relasoens entre F-FDTL ho PNTL, tanba la ajuda país rezolve nia problemas.

Operasaun konjunta, ne'ebé F-FDTL ho PNTL halo, hetan susesu boot iha planus tomak, no, hahú husi ne'ebá, mak hadi'a liután ambiente total kooperasaun ba servisu seguransa no bein-estar populasaun tomak nian.

Ministériu Defeza no Seguransa, aleinde papel primordial atu hatuur metin nafatin prinsípiu konstitusional hanesan subordinasaun forsas rua ne'e ba Estadu de-direitu demokrátiku, hahú mos prosesu todan no naruk ida, maibé konsiente, kona-ba reformas iha instituisoens rua ne'e laran, liu-liu iha PNTL.

Señoras no Señores,

Liutiha siklu tinan lima laran, ohin ha'u mai hikas fali simu pose hanesan Ministru Defeza no Seguransa. V Governu Konstitusional nia filozofia mak continuidade iha politikas ne'ebé uluk asume ona, halo nafatin esforsu atu hadi'a debilidades ka frakezas institusionais, hadi'a liután projesoens programátikas no inovasaun iha misoens diferentes hodi servi ba povu no ba pátria.

Ba oin, ita hotu sei hasoru tempu tinan lima laran, ho servisu todan tebes, ne'ebé sei ezije ita hotu nia esforsus, profesionalizmu iha atuasoens, dixiplina no komportamentu ho seriedade iha ita-nia kompromisus.

Ba F-FDTL ha'u sei continua ezije dixiplina, iha kuartel laran no li'ur. Ha'u sei la tolera abuzus hasoru étika militar, ha'u sei la tolera dezagravus ka desrespeitu ba farda F-FDTL nian nein bele tolera militares sira atu mete fali iha política. Nune'e, ofisiais superiores sira iha obrigasaun atu tau-matan nafatin hodi tane didi'ak instituisaun nia naran, liuhusi mekanizmus kontrolu dixiplina ba sira-nia subordinadus. Ofisiais sira labele uza métodos hanesan 'husik de'it ba', tanba ida ne'e só bele enfrakese liután soldadus sira-nia aptidaun ka kbiit, bainhira bolu sira ba misaun ruma.

FDTL tenke hadi'a jestaun finanseira orsamentu instituisaun nian no hadi'a administrasaun rekursus iha manutensaun patrimóniu.

Ba PNTL mos ha'u hakarak continua ezije dixiplina barak, iha servisu laran ka li'ur. Ha'u sei la tolera abuzus hasoru étika polísia nian, hanesan sei akontese nafatin, no ho forma ida ka seluk, ligadus ba partidus polítikus. Hahú husi ofisiais superiores PNTL nian, imi nia papel mak atu disemina ba membrus sira hotu, dever ba misaun, kompromisu atu servi no obrigatoriedade atu kumpri loloos idaidak nia obrigasoens.

Komando PNTL nia dever mak atu tau-matan mos ba boa jestaun finanseira orsamentu instituisaun nian, atu hadi'a no halo oinsá atu hadi'a administrasaun rekursus no garante boa manuensaun ba patrimóniu.

Instituisoens rua ne'e iha tinan 2013 tenke bele korrije buat ne'ebé presiza korrije, hanesan kona jestaun no administrasaun. Boa governasaun la'ós asuntu membrus governu sira-nian mesak – ne'e asuntu ema hotu-hotu nian ne'ebé simu parte balu husi osan Estadu nian atu jere. Halo planu ne'ebé di'ak la signifika 'hanoin atu halo buat di'ak barak dala ida de'it', atu hatudu katak halo duni, tanba nia rezultadu sei hatudu katak sei la konsege halo didi'ak buat hotu-hotu ne'ebé ita hakarak halo.

Señoras no Señores,

Ha'u halo rekomendasoens hirak ne'e hotu tanba ISF ho UNMIT atu bá ona maibé ho laran-metin katak ita preparadus tebes ona atu kumpri ita-nia misaun hodi garante seguransa ba rikusoin tomak no bein-estar ita-nia populasaun nian.

Hateke fali ba kotuk, ita tenke subliña tulun boot ne'ebé ita simu husi parte Camberra, ba kontribuisaun ne'ebé to'o ohin lora ita benefisia husi ISF. Ba Governu no ba povu australianu tomak, ami hato'o ami-nia obrigadu wa'in tebes.

Sei iha mos kontextu ida ne'e, ita tenke realsa la'ós de'it preokupasaun husi Konsellu Seguransa Nasoens Unidas nian, maibé mos tanba sira hatán tebes duni ba ita nia pedidu ajuda hodi nune'e, nu'udar país, ita la to'o de-monu iha dalan aat ne'ebé bele lori ita sai Estadu falladu ida. Ita tenke agradese no hahí wa'in tebes ba empenhu husi Governus hanesan Portugal ho Malázia, tanba sira mos haruka-mai kedan, sira-nia kontinjentes polisiais.

Ba UNMIT no ba países hotu-hotu ne'ebé envolve no haruka sira-nia polísias mai Timor-Leste, iha momentu ne'ebé ami presiza tebetebes, ami louva esforsu tomak ne'ebé halo, la'ós de'it hodi tulun garante estabilidade interna rai ne'e nian maibé, liu-liu, iha monitorizasau no kapasitasaun ba ami-nia PNTL, halo sira sai profesionais servidores povu timor tomak nian.

Ba sira hotu, mane ka feto, ne'ebé mai haknaar iha UNMIT no UNPOL, ami hato'o ami-nia respeitu no profunda gratidaun.

Muitu obrigadu.